

# Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Riflession tra passât e presint suntun moment fundamentâl dal percors di iniziacion cristiana

## La Messa di prima comunione e il savôr antîc da la cjocolata



FRUTS DI PRIMA COMUNION TAL ZARDIN DAL ASILO SAN GIUSEPPE A SAN ROC (GURIZA), AI 20 DI MAI DAL 1945

**"La messa di prima comunione  
dovârès jessi  
no l'única ma la prima  
di una serie infinida di messis  
par duta la vita dal cristian.  
No un travuart, duncja"**

**S**e un frut nus domanda il significât da la comunione zemût gi podin rispundi? Nol è roba di pôc spiegâ l'event, tignint cont da l'étât dal frut, ma podin ben rispundi cun semplizis peraulis: l'Eucaristia, il pan dividût, 'l è la maniera sielta di Gjesù par jessi simpri vizin a lui, vizin a ducj i fruts. "Lassêt che i fruts vegnin di me e no stêt impedîgilu [...]" dis il Signôr (Mc 10,14). Chiscj versets nus permetin di capî il valôr che jan i fruts par Gjesù, che viôt in lôr il projet di Dio parcè


che jan la semplicitât, jan la speranza, jan la cussienza di no podè vivi di bessôis. E Dio dis: "Jo soi il pan da la vita". Il cristian dai dis di vuê, abituât al percors catechetic cu la tapa da la prima comunione, fâs fadia a pensâ a un percors di iniziacion cristiana senza chist moment fundamentâl. Ma par altri la prima comunione - cun dut il contor da la fiesta - come che nualtris la cognossin no ja plui di trê secui, aben che la storia insegnî che la comunione, par la plui part da lis Glesii cristianis, 'l è il sacrament istituît di Gjesù Crist in timp da l'Ultima Zena cui apuestui e 'l è il sacrament justa apont che da origin a la iniziacion cristiana. La Glesia nas e 'l è nudrida da l'Eucaristia. "L è impuartant che i fruts si preparadin ben a la prima comunione..." ja dit papa Francesc cualchi an indaûr intant di una udienza gjenerâl fevelant cui fruts. Son peraulis significativis e plenis di una umanità come chê che infont il Sant Pari Francesc, che cognòs ben l'impuartanza dal pas che i fruts son daûr a puartâ insom. Si spalanca

davant di lôr un orizzont gnôf, ma pitost misteriôs, ancjamò dut un interrogatîf, che cjatarà rispuesta tai insegnaments dai catechiscj e da lis catechistis. Papa Francesc si ja intardât a ricuardâ ancja che cuant che lui ja fat la prima comunione "no si podeva, prima da la Messa, nancja bevi un pôc di aga, nuia, nancja una gota di aga. 'L è stât Pio XII che nus ja salvât di chista ditatura! 'L è stât brâf...". Celebrâ l'Eucaristia 'l è una realtât fûr dal ordenari e, nancja dîlu, no dèf mancjâ un clima di gjubialità, ancja se l'event 'l è soradut moment di preiera. Come papa Francesc, di sigûr ancja cualchi nono dai comunicants di vuê, o cualsisei persona intimpada, si ricuarda da la sô prima comunione cul vistiari blanc come che si viôt ta fotografia (datazion 20.5.1945) e dal rituâl di in chê volta, che si sa diferent di chel di cumò parzè che divarsa jara la posizion e l'orientament dal altâr. Nol è plui la balastrada, l'element architetonic presint in cuasi dutis lis glesiiis fatis sù prima da la riforma liturgjica par favorî la distribuzion da

la comunione in zenoglon senza impedî la vista dal altâr maiôr; ma no dome, bisognava ancja lâ a confessâsi tal confessionari. Svicinâsi a la balastrada parecjada cul mantil di altâr ricamât di fin faseva vignî la tremarola e in zenoglon (i plui pizui dovevin restâ in pîts se no il predi nancja no ju viodeva) si rizeveva la comunione dai ministris da l'Eucaristia compagnâts dai zagos che slungjavin il platut. Dopo da la celebrazion si lava intuna sala metuda a disposizion da la comunitât par un moment conviviâl. Allora la prima comunione cuistava il savôr antîc da la cjocolata e no jara roba di pôc podè gustâsi una scugjela di cjocolata fumanta a la fin di un dizun durât, a di pôc, sù par jù vincj oris, da la puora zena da la di prima. La cjocolata, chê che vevin sumiât e che la podevin di râr gustâ! Jara pardabon una fiesta. Po si sparnizavin su la via di cjsa dulà che nus spietava, forsi, un gustâ un pôc plui ric di chel solit da la domenica. Ma si capiva che scomenzava un timp gnôf e che ognidun cuistava un puest un tic plui impuartant di prima dentri da la comunitât parochiâl: la domenica varessin condividût cui grancj il moment di lâ al altâr par rizevi l'Eucaristia. No si pol dismenteâ chê zornada. Cumò in chest timp di pandemia una da lis preocupazions 'l è stada chê da la messa di prima comunione. Come che dis il non stes, la messa di prima comunione dovârès jessi no l'única ma la prima di una serie infinida di santis messis par duta la vita dal cristian. No un travuart, duncja. Di sigûr sin daûr a vivi un cambi di epoca e 'l è cambiât e continua a cambiâ il mût di vivi. Ma 'l è cambiât ancja il cûr? Il vescul Carlo ta sô ultima letara pastorâl conclût: "La pandemia no ja distrut la nestra societât, ma di sigûr, come tantis voltis si à dit in chiscj mès, 'nuia no sarâ plui come prima'. Dome in futûr però savarin chel che sarâ piardût par simpri, chel che restarâ e chel che sarâ di gnôf".

Anna Madriz

## Cjsa Ascoli e je vierte la joibe e si pues viodi la mostre "Lis lenghis di Guriza" La Filologjiche e torne a vierzi al public lis sôs sedis



CJASA ASCOLI (FOTO SCLAUZERO).

**C**u la jentrade in "zone blancje", la Societât Filologjiche Furlane e torne a vierzi al public lis sôs sedis, simpri tal respit da lis regulis cuintri il Coronavirus. Si pues duncje jentrâ un a la volte cun intor la mascarute e mantignint la juste distance di chei altris. A Udin (Palaç Mantica, vie Manin 18) la Segretarie e il Bookshop a son vierts di lunis a vinars da lis 9 a lis 12.30 e da lis 14.30 a lis 18.00 (tel. 0432 501598 int. 1 - info@filologicafriulana.it). Tai stes oraris, ma par apontament, e je vierte ancje la Biblioteche (tel. 0432 501598 int. 2 - biblioteca@filologicafriulana.it). A Guriza si torne a vierzi la sede pal Friûl di soreli jevât, Cjsa Ascoli, in vie Ascoli 1. Chest edifici al à une grande impuartance pe Societât Filologjiche

par vie che culh al nassè il glotolic gurizan Graziadio Isaia Ascoli (1829-1907), che il Sodalizi i è intitulât. Dentri si pues visitâ la mostre permanente "Lis lenghis di Guriza": une esposizion che e intint fâ cognossi il particolâr contest lenghistic, storic e culturâl da la citât, che propit inte pluralità da lis tradizions e da lis lenghis e cjate il vèr caratar distintîf da la sô identitât. In Cjsa Ascoli e je ancje la sede gurizane da la Biblioteche de Filologjiche, cuntun fonts di 1.800 volums, inviât cui volums di Dionigi Ussai e insiorât di edizions dal Sietcent e dal Votcent. Cjsa Ascoli e je vierte al public la joibe da lis 9 a lis 12.30 e da lis 14.30 a lis 18.00 (tel. 0481 533849, gorizia@filologicafriulana.it).